

新續渭南縣志

一
函十冊

新續渭南縣志卷九

節烈志

忠臣節婦天地之紀也說者謂婦節尤難里巷笄幃之流非有詩書姆保之訓乃能秉禮度義堅貞持節甚至刼火兵塵殺身成仁而皦然不滓謂非天植其性哉今令甲有旌典而或以年遠失其姓氏或以無力上達磨滅不著者多矣用是博稽遠采述其節概俾幽操遺烈雖未得邀榮於當時庶幾有聞於來世而不終泯也述

節烈志

傳

唐皇后王氏 元宗后下邳人梁冀州刺史神念之裔孫
元宗爲臨淄王聘爲妃將清內難預大計先天元年立爲
后久無子而武妃稍有寵后不平顯詆之然撫下素有恩
終無肯譖后短者帝密欲廢兄守一懼爲求厭勝浮圖明
悟數祭北斗以禳之事覺劾有狀帝以后有無將之心不
可以承宗廟母儀天下遂廢爲庶人初后不自安乘間泣
曰陛下獨不念阿忠脫紫半臂易斗麵爲生日湯餅邪帝
憫然阿忠后呼其父仁皎云未幾卒以一品禮塋後宮思
慕之帝亦悔寶應元年追復舊號

宋馬氏 下邳李好義妻好義爲興州正將吳曦反將之

之拜決于家廟囑馬氏曰當自爲計生死從此決矣馬氏之母亦曰行矣勉之汝兄弟生爲壯夫死爲英鬼好義喜曰婦人女子尙念朝廷我輩當何如

按國史類書均列后妃外戚賢媛傳而邑志記一邑之事節烈而外門類未便多列若唐元宗廢后王氏宋李好義妻馬氏均非節烈而懿行奇事昭著史冊附之仁皎好義本傳似非志體溯查康對山武功志例烈女先志帝譽元妃太姜而後志及臣庶妻今渭志節烈亦應倣武功志例先志廢后王氏李好義妻馬氏而後志及他姓節烈此以類相從之義亦見貴賤分殊並可省多

列門類以歸簡易云再王仁皎本外戚今載入宦業與
王氏馬氏載入節烈志意同

孝女

新續

田月香 田玉潤女也痛父無子不嫁回亂男裝逃難人
無知者事平後負父骸歸葬盡禮叔姑謀奪其志議成勢
將逼勒女覺潛往父墓避焉時天寒大雪凍不可忍一晝
夜竟不死鄉人異之爭以錢米相賙卹叔姑畏公論事遂
寢取族人子繼父後且生孫矣當代華陰王守恭三原賀
瑞麟長山焦雲龍邑令趙嘉肇皆紀其事趙并上其事請

旌

田珍女 田二酉女也二酉病女剝指合藥以進

陳鍼女 陳玉信之女幼字王姓未嫁王歿女傷父母無子誓不再婚年三十六而卒

烈女

明李烈女 集賢里李自升女流寇逼不從被殺年十八
劉貞女 孝廉劉懿宗長女性婉順與女弟靜同處不知其爲姊也父善病問安惟勤關切若成人許字華陰王少司馬子諸生弘撰之子年十四

劉靜女 懿宗次女幼慧二歲時已誦唐詩數十首及小

兒語解其意婢子輩未嘗少加凌虐許字南大司空子諸
生廷鈐年十三懿宗攜子母避亂南山之昌李堡杆寇擁
衆千餘逼堡時懿宗守城杆賊陷堡昇懿宗去子母懼汚
并投一井死

清甯娥 武定里邦舉女生有殊姿精女紅寡言笑目不
窺戶外母歿號泣不食者數日族黨奇之賀兵經過擄掠
村落一時婦女踉蹌逃避家人要娥相從娥曰我處女也
出將焉往解膝帶縊於後園樹下

楊烈女 楊廷之女嘉慶四年 旌

新續

張珍英 張永昌之女幼字生員楊向榮未嫁而楊卒女
絕粒母百方勸慰終不食七日而逝臨終囑與楊合葬夫
家不允鬼猶數年夜哭不已

常曉烟 武生常豐之女同治元年回亂女年十五與母
張氏避樓上賊至見女有殊色欲污之女罵不從賊怒殺
之母亦墜樓死

孟眸兒 孟崇道之女同治元年賊至女匿牆穴中賊搜
出曳之行女大罵賊斷其足亂刀砍死時年十九歲

王招棣 王繼泰女字同村馬祥泰祥泰出外未婚而回
亂父付女于馬值賊猝至嫂某持刀刎頸手弱不能卽死

女奪刀奮曰尙是惜生時耶奮力斷喉而死時年十七歲
王能兒 王丕全之女同治元年被賊擄逼罵不從賊強
沃上車墜地者再賊無如何拔劍刺心而死

馬木花 馬中魁之女年十五回亂匿柵中賊搜得之強
扶而行女厲聲怒罵身受數十刃而死

徐盡女 徐居貴之女同治元年回欲携女去女大罵賊
扶上車搶地者數次賊敲其牙猶含血罵不已遂斷女兩
肩及腿而死

蘇烈女 生員蘇凌霄女也字孫修園同治元年回亂凌
霄付女于孫未及完婚賊突至掠女上馬女哭罵撲地賊

逼以及罵愈力遂觸墻死時年十六 學使柯公匾其門

黃賢姐 諸生黃奠堃女也幼字本里卽鼎元鼎元賈西
域未婚而回亂回平後鼎元猶不歸父母欲另選壻女聞
之服毒死時年二十四事聞 旌表

楊水華 民人楊毓清次女也同治元年回匪焚掠鄉村
舉家逃難富平油店村忽有傳言賊來掠民婦女水華時
坐祖母側乃起語曰倘不測祇有死耳祖母云小小年紀
動輒言死死豈易事耶未幾賊至水華隨祖母避地窖中
賊知有窖徧搗之水華被掠陰藏一履腰間故跣一足跛
而出賊悅其色欲掠去水華紿之曰旣蒙見愛亦願相從

但墮一履於窖中須著履而後行賊不知窖邊有井許之水華返身投井死闔家以爲掠去越二日乃得其屍井中面如生油店村人至今猶稱道其烈不置云

曹菜玉 曹興鐸之女同治元年年未及笄五月興鐸殉難女痛父遇害罵賊投井死

王對對 同治元年回匪至將擄女對對大罵不從撲井死時年十五

白烈女 白世春之女同治六年方十六歲被賊擄去欲犯之女不從大罵賊不怒反以甘言慰之女乘間觸柱死

張花姑 張繼倫之女年十六回亂父受重傷餘息尙存

女不忍去賊劫之花姑大罵觸刃死其母藍氏因護花姑亦被刃破腹墮胎死

楊棟姑 楊逢春之女年十八許字王姓未婚回亂父母付棟姑于王王有老祖母在堂或告賊至矣家人俱逃棟姑不忍去投井死

劉唐英 劉炳麟之女年十六回亂強扶上馬女怒罵不從殺于途

魏烈女 魏許昌女同治元年回亂罵賊不屈死

孝婦

新續

蘇氏 劉思愷妻事姑以孝聞姑病垂危用藥罔效乃禱于灶神前願減已齡增姑壽并割臂肉煎湯以進移時卽甦遠近稱之

李氏 馮文博妻割股療親疾里人稱之

唐氏 郡庠生張德純妻割股療親病因獲痊

馬氏 陳廷寶母年十八夫亾事姑以孝姑病割股和藥進之

易氏 王學詩妻年二十夫故撫姪瑞鵬爲嗣姑疾割臂和藥進之

王氏 朱定家妻姑久患頭疼百藥罔效有道人造門募

化言其姑病非人肉莫愈忽不見氏異之乃引刀割左臂
和藥以進姑服立愈瘡痂不旬日亦脫人以爲孝心所感
張茹莪 張春玉女白興德妻也處女時割股療祖母周
氏母魚氏疾皆獲痊鄉里稱之

王氏 趙丕成妻年二十二夫亡無子回亂一家盡逃姑
癱不能去氏負姑匿之卒免于難

賈氏 詹多堂妻年二十九夫亡事姑病盡孝因勞致盲
後目復明人以爲孝德所感

常氏 蘭兆鳳妻夫死回亂家人聞驚盡走翁老病不能
行氏負而逃翁死于外復負骸歸尸于堂賊火其屋氏抱

尸呼天而號，燄將及膚，猶痛哭不去。天猝反風，止火。尸乃獲全。

烈婦

明安氏 韓馬里張猷妻。猷，亡安。卽自縊殉之。知縣張廷鳳上其事。嘉靖三十二年十月，詔旌其門。

較氏 水手里雷同繼妻。夫亡，僅一女。夫叔吞其產，幾盡。且謀嫁之。氏破面剪髮，以守。窘辱備極，不變也。洎翁姑逝，氏謂女曰：「往，吾不死者，以翁姑暨若耳。今翁姑就窆，若又嫁，是我報若父地下時矣。」絕粒而死。萬曆四十一年旌。東氏 諸生南仰仲妻。仲早逝，東年十有八，慟仆伏屍。亟

欲身殉其母及姑覘其志不可奪乃戒諸婦輩日夜遞相環衛密甚逾兩月而舉塋事東益號泣絕粒不言竟以身殉知縣褚順聞於當道扁其門

明叅議南公曰死固有重於泰山卽丈夫亦甚惜焉東氏少年女流耳一旦夫亾甘心以殉是尙不足爲烈乎其事已聞於當道顧至今閭而未旌輿論謂何嗟嗟四封之內勁節水操俾之泯泯不彰於世者顧不止東氏殞已耳可勝悼哉可勝悼哉

王氏 仁得里諸生張而弛繼室王立敬女適張有年值夫病王昕夕憂勞跪禱求延夫命洎篤謂夫曰妾以君爲

天今君將棄妾妾安能獨生九京和鳴妾矢之天日矣其夫領之洎卒泣血柩側絕粒毀容已而吞毒投繯咸以家衆解不得死俄而防少疎遂鍵關潛縊卧內百方救之靡及矣時年三十有一及斂其面如生神氣猶勃勃焉人謂造化不欲死也

樊氏 臨潼樊自秋女卽而弛側室于歸卽不得于主翁

每令改適樊啼泣曰妾托君百年縱不能以色取容甯吝

一席地使妾作宅家鬼邪洎而弛病樊獨理醫藥察食簋

憂形於色樊每詣而弛候而弛卽卧內挫辱之曰汝何泣

卽泣疇德汝且曰吾置汝爲後嗣計今無出宜

善他人樊